



Messadi per la radunanza communal digls 21 d'avregl 2017

Stimadas votantas, stimos votants

Suandontamaintg az infurmainsa dallas tractandas tgi vignan discussiunadas e deliberadas alla radunanza communal digls 21 d'avregl 2017.

Protocol dalla radunanza communal digls 12 da december 2016

Digl protocol ò savia neir piglia invista, u tg'el ò savia neir retratg, a parteir digls 6 da schaner 2017 durant 30 deis an canzleia commuala. Durant chel taimp da publicaziun èn antradas nignas protestas. Igl protocol vala damai per approvo e vign sottacretg digl mastral e digl protocollist.

Alvaschagn: cumplettaziun dall'avertura digl gôt Sulom – Lueras – credit brut da 2'100'000.00 fr.

La cumplettaziun digl gôt da schurmetg digl anteriour cumeegn Alvaschagn succeda sur las veias da vischnanca. Igl project cuntigna l'amplificaziun e la reparatura digl access agls gôts da schurmetg davent da mez vischnanca d'Alvaschagn anfignen agl our sot digl Gôt Spess. La part dalla veia tgi ò da neir cumplettada maseira 1'320 m. La veia vo igls amprens 350 m tras territori abito e sessour igl ple sur territori avert, tras pros e perlung da seivs veivas e pitschnas populaziuns forestalas, anfignen agl our sot digl Gôt Spess. L'antiera surfatscha da gôt ainfer igl perimeter d'avertura è ca. 90 ha. Tar igls gôts sa tractigl prest angal da gôts da schurmetg, digl qual la gronda part cun 53 ha è digl tip A cun ot risc. Igl costs da construcziun digl project montan a radond 2.1 miu. fr. (incl. TPV). Las contribuziuns da confederaziun e cantun agls costs da selvicultura rancunaschias èn prevediblamaintg 70%. An connex cun la fusiun digls cumeegns ò la regenza rancunaschia la sanaziun dalla veia da gôt Sulom – Lueras scu ovra singula e siero ena contribuziun pauschala agls costs restants da 315 000.- fr. La contribuziun da terzas persungas monta a radond 25 000.- fr. La realisaziun digl project succeda a parteir dalla premaveira/stad 2017 anfignen la premaveira/stad 2019.

Lescha dallas tariffas generalas digl cumegn Albula/Alvra

Chella lescha regla igl incasso da taxas e l'indemnisaziun da costs per disposiziuns e decisiuns, scu er per igl adiever d'indrezs publics e tgossas digl cumegn. Ainten chella lescha montan:

- a) tariffas administrativas: indemnisaziun per activitads statalas.
- b) tariffas d'adiever: indemnisaziun per far adiever d'indrezs e tgossas publicas, schichel surpassa en adiever general.
- c) expensas: las ulteriouras expensas effectivas caschunadas agl cumegn cun adampleir prestaziuns da sarvetsch sottamessas allas tariffas. Tranter chellas crodan an spezial costs per terzas persungas scu expertisas, procurar documaints, costs da transmissiun e communicaziun, scu er costs da viadi e transports.

La suprastanza communal relascha en reglamaint da tariffas, surtot sur dallas tariffas da taxas. La lescha preschainta è sottamessa agl referendum facultativ. La suprastanza communal determinescha igl mument d'antrada an vigour dalla lescha.

Lescha da pulizeia digl cumegn Albula/Alvra

Chella lescha cuntigna an cumplettaziun dalla legislaziun federala e cantunala, determinaziuns per igl territori communal:

- a) per igl mantignamaint dalla siertad e digl urden public;
- b) per la concessiun da siertad da persungas ed animals;
- c) per igl schurmetg digl ambiaint e digl possess ancunter donns e prieveles da tot gener;

La suprastanza communal è l'autorità puliziala suprema. Ella relascha en reglamaint per l'execuziun da chella lescha. La lescha preschainta è sottamessa agl referendum facultativ. La suprastanza communal determinescha igl mument d'antrada an vigour dalla lescha.

Alvagni: sanaziun Voia Viglia digl Bogn – adattaziun digl project (infurmaziun)

A caschung dalla radunanza communal digls 16 da settember 2016, on votantas e votants concedia en credit brut da 668 000.- fr. per la sanaziun dalla Voia Viglia digl Bogn ad Alvagni. Igl project prevediva d'allontanar la truasch da vischnanca existenta, an favour dalla restrucraziun planisada dall'antrada existenta dalla buteia digl VOLG. Sen basa da novas cunaschientschas vign chella sanaziun (buteia VOLG) betg realisada an chella furma, chegl vot deir, tgi la truasch da vischnanca resta er siva dalla sanaziun dalla Voia Viglia digl Bogn agl li existent. La realisaziun digl project succeda a parteir dalla stad 2017.